

خَطِ اَوَّلِ پوُلُسِ بَلَدِه

ایماندارایِ تِسَالونِیکِی

پیشگفتار

امی خطِ بَلَدِه ایماندارایِ شارِ تِسَالونِیکِی نوشته شده. تِسَالونِیکِی پایتختِ ولایتِ مَقَدونیه بُود و مَقَدونیه یکی از ولایت های امپراطوری رُوم.

پوُلُس وختیکه شارِ فِیلِیپی ره ایله کده دَ تِسَالونِیکِی رفت، اُو مردُمِ اَزونجی ره دعوت کد که دَ مسیح ایمان بیره و ازوا یگ جماعت جور کد، مگم کلو وخت تیر نشد که یهودیا قد ازو مُخالفَت ره شروع کد. اونا وختی دید که کارِ اعلان کدون خوشخبری پوُلُس دَ مینکلِ مردُمایِ غَیرِ یهُود دَ کامیابی پیش موره، قارِ ازوا باله اَمَد و اونا بَخیلی ره شروع کد، چُون کلو مردُمایِ غَیرِ یهُود پیش ازو دَ یهُودیتِ دلچسپی دَشت. مُخالفَتِ ازوا دَ اندازه کلو شد که پوُلُس مجبور شد تِسَالونِیکِی ره ایله کنه و دَ شارِ بیریه بوره. بعد از یگ مُدت وختیکه پوُلُس دَ شارِ قُرنتُس رفت، همکار شی تِیموتائوس بَلَدِه ازو دَ باره ایماندارایِ تِسَالونِیکِی خبر ری کد. مُطابقِ خبرِ تِیموتائوس، دَ مینکلِ ایماندارایِ تِسَالونِیکِی دَ باره پس اَمَدونِ مسیح سوال پیدا شُد. امزُو خاطر پوُلُس لازم دید که مَوْضوع ره بَلَدِه ازوا بیان کنه.

پولس د امزی خط بلده خبر خوب که د باره ایمان و محبت ایماندارای تسالونیکي شنیده، خدا ره شکرگزاری مونه و د یاد ازوا میره که او د مینکل ازوا چی رقم زندگی موكد. پولس شوق و علاقه خو ره بلده دوباره دیدون ازوا اظهار مونه و اونا ره نصیحت مونه که زندگی پاک و مقدس دشته بشه. بعد ازو د سوالهای که د باره پس آمدون مسیح و د باره ایماندارای فوت شده د مینکل ازوا پیدا شد، جواب میدیه و د باره ازی که مسیح چی وخت و چی رقم پس مییه و قد ایماندارای فوت شده د وخت آمدون مسیح چیز کار موشه بلده ازوا بیان موکنه.

فهرستِ عنوانها

- سلام ها (فصل ۱: آیه ۱)
- شکرگزاری و دعا (۲:۱)
- خدمتای پولس د ایماندارای تسالونیکي (۱:۲)
- خبر خوش و دلگرم کننده تیموتائوس (۶:۳)
- زندگی مطابق خاست خدا (۱:۴)
- ظهور مسیح (۱۳:۴)
- تیاری بلده ظهور مسیح (۱:۵)
- نصیحت های آخری (۱۲:۵)

سلام ها

۱ از طرف پولس، سلوانس و تیموتائوس، تقدیم د جماعت ایماندارای شار تسالونیکي که د آته مو خدا و د مولا عیسی مسیح تعلق درید: فیض و سلامتی نصیب شمو سته!

شکرگزاری و دُعا

۲ مو همیشه خُدا ره بَلدِه پگ شُمو شُکر-و-سپاس مُوگی. دَ دُعاى خُو هر وخت شُمو ره ذِکر کده ۳ اعمالِ پُر ایمان، کارِ پُر مِهَر-و-مُحَبَّت و اُمیدِ اُسْتوارِ شُمو ره دَ مَوْلایِ مو عیسیٰ مسیح، دَ حُضُورِ آتِه مو خُدا یاد مونی. ۴ آی برارو، مو میدنی که خُدا شُمو ره دوست دَره و شُمو ره بَلدِه مقصدِ خُو اِنْتِخاب کده، ۵ چُون زمانی که مو خوشخبری ره دَز شُمو اِعلان کدی، تنها لَفْظی اُو ره نَگُفتی، بَلْکِه دَ قُدْرَتِ مُعْجِزِه ها و رُوحِ اَلْقُدْس و دَ یَقین-و-اِطْمینانِ کَامِلِ اُو ره دَز شُمو رَسَندى. شُمو دِیدید که مو دَ بَینِ شُمو چَطُور رَویه-و-رِفْتار مُوکدی و چِیقِس دَ فِکْرِ شُمو بُودى. ۶ شُمو از مو سَرْمَشَقِ گِرِفْتِید و از مَولا پِیروى کدِید و اِگِرْچِه از خَاطِرِ پِیغامِ خُدا رَنجِ کَلو دِیدید، ولِے باز ام شُمو اُو ره دَ خُوشی که رُوحِ اَلْقُدْس مِیدیه قَبُولِ کدِید. ۷ دَمزى رَقْمِ شُمو بَلدِه پگِ اِیماندارا دَ مَنطِقِه هاى مَقْدونیه و اَخیا یگِ اَلْکُو جُور شُدِید. ۸ اَلی کلامِ مَولا تَوسُطِ اَز شُمو نَه تنها دَ مَقْدونیه و دَ اَخیا پَخش شُدِه، بَلْکِه توره ها دَ باره اِیمانِ شُمو دَ خُدا، دَ تَمَامِ جَای ها دَ گُوشِ مَرْدُمِ رَسِیدِه. پس لَازِمِ نِییه که مو یگو چیز بُگی، ۹ چِراکه مَرْدُمِ اَمزُو جَای ها خُودون شی شَاهِدِی مِیدیه که شُمو چی رَقْمِ قَدِ اَز مو خُوشامد-و-پِیشامد کدِید و دَ چی نِیتِ پاکِ اَز بُتِ پَرستى دِستِ کَشِیدِه سُونِ خُداى زنده و حَقِیقِی رُوى اُورِیدید تا دَزُو خِدْمَتِ کِنِید، ۱۰ و دَ چی شُوقِ کَلو مُنْتَظِرِ ظُهُورِ باچِه اَزُو یَعْنِی مَولا عِیسیٰ، از عَالَمِ باله اَسْتِید. خُدا اُو ره دُوباره زنده کد و اُو مو ره از غَضَبِ اَخِرَتِ نِجاتِ مِیدیه.

خِدْمَتایِ پوُلَس دَ اِیْمَانْدَارایِ تِسَالوِنِیکِی

۲ برارونِ عزیز، خودون شُمُو خِبر دَرِید که اَمَدونِ اِزمو دَ پیش شُمُو بے فایده نَبُود. ۲ شُمُو مِیدَنِید که مو دَ شارِ فِیلِیبِی رَنجِ دیدِی و چِیقِسِ مَرْدُمِ قَدِ اِزمو بَدَرَفْتاری کَد. لیکِن باوِجُودِ اِمزیِ مُخَالَفَتِ هَایِ سَخْتِ، خُدا دَزِ مو جُرَاتِ دَدِ تا که خوشخبری خُدا ره دَزِ شُمُو بَرَسَنی. ۳ نَصِیْحَتِ -و- تَشْوِیْقِ اِزمو نَه از کُمرَهِی بُوَد و نَه دَ نِیْتِ نَپَاکِ و نَه اَم دَ فَرِیْبِ دَزِ شُمُو رَسِید. ۴ بَرِ عَکَسِ، خُدا از مو راضی شُد و اِعلَانِ کَدونِ خوشخبری ره دَ عُهُدِهِ اِزمو اِیشت. و مو دَ ای مَقْصَدِ خوشخبری ره اِعلَانِ نَکَدی که مَرْدُمِ از مو راضی شُنَه، بَلِکِه مو رَضَايَتِ خُدا ره مِیخَهِی، چُونِ خُدا از تَمَامِ نِیْتِ دِلِ هَایِ مو خِبر دَرَه. ۵ شُمُو مِیدَنِید که مو هِیچِ وختِ کوشِشِ نَکَدی که قَدِ زِبُونِ لَخْشَمِ شُمُو ره جَلَبِ کَنی و نَه اَم از خَاطِرِ کُدَمِ مَنَافِعِ شَخْصِیِ دَ دِیْرِ شُمُو اَمَدی؛ خُدا دَزِی باره شَاهِدِ اَسْتَه. ۶ مو از مَرْدُمِ اِحْتِرَامِ -و- بُزُرْگِیِ نَخَاسْتِی، نَه از خُودِ شُمُو و نَه از کَسِ دِیگِه، اِگَرچِه بَحِیْثِ رَسُوْلَیِ مَسِیْحِ مو اَمی حَقِ بُزُرْگِیِ ره دَ بَلِه شُمُو دَشْتی. ۷ لیکِن مو قَدِ شُمُو دَ نَرْمی -و- مُلَايْمَتِ رِفْتَارِ کَدی، مِثْلِ یگِ اَبِه مِهرِبو که از نِلْغِه گونِ خُو اَبِیلَه مُونَه. ۸ مَحَبَّتِ -و- عَلاقَه اِزمو دَ باره شُمُو تا اِمزُو حُد بُوَد که نَه تَنها پِیغامِ خُدا ره دَزِ شُمُو اِعلَانِ کَدی، بَلِکِه حَتی زِنْدَگِیِ خُو ره اَم دَ اِخْتِیارِ شُمُو اِیشتی، چِرا که شُمُو اَمُوَقَسِ دَزِ مو عَزِیز بُوَدِید. ۹ بَرارو، مُشَقَّتِ و سَخْتِ هَایِ ره که مو دیدِی حَتَمًا از یَادِ شُمُو نَرَفْتَه بَشَه: شَاو و رُوزِ مو زَحْمَتِ کَشِیدَه بَلَدِه تَهیَه مِعَاشِ خُو کارِ مُوکَدی تا که از خَاطِرِ رَسَنْدُونِ پِیغامِ خُدا سَرِبَارِ یگُونِ شُمُو نَشْنی. ۱۰ و

شُمو، اى ايماندارا، شاهد اَسْتِيد كه دَ چى پاكي و دَ چى عدالت و خُلُوصِ نَيْتِ قَدْ شُمو رفتار مُوكدى و خُدا خود شى ام دَزى باره شاهد اَسْتِه. ^{۱۱} امچنان شُمو مِيدَنِيد كه مو قد هر كُدمِ از شُمو اُمُو رَقْمِ رفتار مُوكدى، كه يگ آته قد بچكِيچاى خُو رفتار مُونه: ^{۱۲} مو شُمو ره نَصِيحَتِ مُوكدى، دِلدارى مِيددى و شُمو ره شَلَه موشدى تاكه رفتار شُمو قابلِ قَبُولِ خُدا بَشَه، چُون اُو شُمو ره دَ پادشاهى و جلالِ خُو دَعَوَتِ مُونه.

^{۱۳} و ازى دَلِيلِ ام مو دايم خُدا ره شُكر مُونى، چُون وختيكه پَيغامِ خُدا ره دَز شُمو اِعلانِ كدى، شُمو كه اُو ره از دانِ ازمو شِنِيدِيد، اُو ره توره اِنسانى فِكْر نَكِيد، بَلَكِه اُو ره دَ عِنوانِ كلامِ خُدا قَبُولِ كِيد كه واقعاً كلامِ ازُو ام اَسْتِه و دَ زِندگى شُمو كه ايماندار اَسْتِيد كار مُونه. ^{۱۴} اى بَرارو، شُمو از جماعتِ هاى ايمانداراى خُدا كه دَ مُلكِ يهوديه اَسْتِه، تَقْلِيدِ كُنِنده شُدِيد، يعنى اُمُو رَنج-و-سختى هاى كه اونا از خاطرِ ايمانِ خُو دَ عيسىِ مَسِيحِ از وطنداراى يهودى خُو دِيد، شُمو ام از دِسْتِ وطنداراى خودون خُو دِيد. ^{۱۵} مَولا عيسىِ و اَنبِيا ره يهوديا كُشت و آلى اونا مو ره ام آزار-و-اَدِيَتِ مُونه. خُدا ازوا خوش نيبه و اونا مُخالفِ پگِ مَرْدُمِ اَسْتِه ^{۱۶} و كوششِ مُونه مو ره از رَسندونِ پَيغامِ خُدا كه باعِثِ نِجاتِ مَرْدُمِ غَيْرِ يهودِ موشه، مَنعِ كنه. دَزى رَقْمِ بارِ گناهِ هاى ازوا گَرَنگتَرِ شُدِه موره و دَ آخِرِ غَضَبِ خُدا دَ بَلَه ازوا نازلِ موشه.

^{۱۷} بَرارونِ عَزِيز، بعد ازُو كه يگ مَدَتِ ره از شُمو دُور شدى،

اگرچه دل مو از شمو دور نبود، مو دُوچند زیادتَر د ای آرزو بودی و کلو کوشش موكدی که روی شمو ره بسم بنگری. ^{۱۸} مو میخاستی که د پیش شمو بییی و مخصوصاً خود مه، پولس، بارها کوشش کدم که د دیر شمو بییم، لیکن شیطو مو ره نه ایشت. ^{۱۹} امید و خوشی و تاج افتخار ازمو چی آسته؟ آیا شمو نیستید که د وخت ظهور مولا عیسی د حضور ازو باعث سریلندی ازمو موشید؟ ^{۲۰} آرے، شمو افتخارات و خوشی ازمو آستید.

۳ ^۱ آخرکار که دیگه تحمل نتنستی از شمو بے خبر بشی، اوخته تصمیم گرفتی که مو تنهای خو د شار آتن بُمی ^۲ و تیموتائوس ره د دیر از شمو ری کدی. او یگ برار ایماندار و یگ همکار ازمو د راه خدا و د پخش کدون خوشخبری مسیح آسته. او ره د پیش شمو ری کدی تاکه او شمو ره د ایمان تشویق کنه و دز شمو دلداری بدیه ^۳ تا هیچ کدم شمو د اثر امزی رنج ها-و-زحمت ها دلسرد نشنید، چون شمو خوب خبر درید که مو بلده امزی مقصد مقرر شدی که رنج-و-زحمت بنگری. ^۴ راستی، زمانیکه مو قد شمو بودی، پیش از پیش دز شمو گفتدی که رنج-و-آزار د انتظار شمو آسته؛ و شمو میدنید که واقعاً امی رقم شد. ^۵ امزی خاطر وختیکه طاقت ازی ره ندشتم که دیرتر از شمو بے خبر بشم، اوخته یگو کس ره د پیش شمو ری کدم تاکه او از استواری ایمان شمو اطمینان حاصل کنه. ما ترس خوردم که شیطو شمو ره وسوسه کده بشه و تمام زحمتای مو از بین رفته بشه.

خبرِ خوش و دلگرم کُننده تيموتائوس

ليکن آلي تيموتائوس از پيش شمو پس د دير ازمو آمده و د باره ايمان و مُحَبَّت شمو دز مو خبرِ خوش اُورده که شمو هر غيت مو ره ياد مُونيد و د شوقِ ديدارِ مو اَسْتيد، دَمزُو اندازه که مو ام د آرزويِ ديدارِ ازشمو اَسْتي. ^۷ پس آي برارو، باوجودِ ازي که مو دچارِ پَرِيشاني و مُصِيبَتِ اَسْتي، ليکن از شنيديو د باره ايمان شمو تَسَلِّي پيدا کدي و آسوده شدي. ^۸ و آلي که شمو د خُداوند اُسْتوار اَسْتيد، زندگي ازمو تازه موشه. ^۹ نَمُوفاَم، قد چيزخيل مو ميتني از خدا شکرگزاري کني بخاطرِ پگِ امزي خوشي که د باره ازشمو د پيشگاهِ خدا احساس موني. ^{۱۰} ليکن شاو و روز د شوقِ کلو دُعا موني و از خدا طلبگار اَسْتي که بسمِ رُوي شمو ره بنگري و هر رقم کمبودي ايمان شمو ره پوره کني.

^{۱۱} مو دُعا موني که آته مو خدا خود شي و مولاي مو عيسي، راه ره بسمِ بلده ازمو واز کُنه تا د دير شمو بيبي ^{۱۲} و دُعا موني که مولا مهر-و- مُحَبَّت شمو ره بلده يگديگه شمو و بلده پگِ مردم کلو کُنه، امو رقم که مُحَبَّتِ ازمو بلده شمو کلو اَسْته. ^{۱۳} او د وسيله مهر-و- مُحَبَّتِ دل هاي شمو ره قوی کُنه تا د امزو روز که مولاي مو عيسي قد مقدسين خو دوياره ظهور مونه، شمو د نظرِ آته مو خدا پاک و بے عيب بشيد.

زندگي مطابقِ خاستِ خدا

۴ دَ آخِر، اَى برارو، شُمُو از مو ياد گِرِفْتِيد که چَطور بايد رفتار کُنِيد تاکه خُدا از شُمُو خوشنُود بَشه و شُمُو اُمُو رَقَم ام زِندگي مُونِيد. آلي مو دَ نامِ مَولا عِيسَى دَ پيش شُمُو زاري مُوني و دَز شُمُو تَاکِيد مُوني که ازي کده ام کَلوَتَر کوشِش کُنِيد. ۲ چُون اُمُو احکام ره که مو از طرفِ مَولا عِيسَى دَز شُمُو دَدِي، پگ شُمُو مُوفامِيد. ۳ خاست-و-اراده خُدا مُقَدَّس شُدون شُمُو اَسْتَه، يعنى از هر رَقَم فِسادِ اخلاقي و زِناکاري خود ره دُور نِگاه کُنِيد. ۴ هر کُدَم شُمُو بايد بُفامِيد که جِسَم خُو ره چي رَقَم اداره کُنِيد و اُو ره دَ پاکی و عِزَت نِگاه کُنِيد. ۵ و رَقَم مَرْدَمِ خُدا نَاشِناس اَلِي بِنْدَه شَهوت و هَوَس ها نَبَشِيد. ۶ هِچ کس نَباید دَ حَقِ يگ برار خُو تَجاوَز کنه و نَه ام دَزي باره کس ره بازي بَدِيه، چراکه خُداوند از پگ امزي کارا اِنْتِقام مِگِيرَه. اِي تورا ره مو از گاه دَز شُمُو کُفْتَدِي و تَاکِيد کُدِي. ۷ خُدا مو ره بَلَدِه ازي اِنْتِخاب نَکده که مو دَ ناپاکی زِندگي کُنِي، بَلِکِه براي ازي که پاک و مُقَدَّس بَشِي. ۸ پَس کسي که امي نَصِيحَت ره رَد مُونَه، اُو شَخْص نَه اِنسان ره، بَلِکِه خُداي ره اِنکار مُونَه که رُوح اَلْقُدس خُو ره دَز شُمُو مِيدِيه.

۹ دَ باره مُحَبَّت دَ بَيْنِ برارو لَازِم نِيسْتَه که دَز شُمُو يگو چيز نَوشْتَه کُنَم، چُون خودون شُمُو از خُدا ياد گِرِفْتِيد که چي رَقَم بايد قد يگدِيگِه خُو مُحَبَّت دَشْتَه بَشِيد. ۱۰ شَک نِيبِه که شُمُو دَ تمامِ وِلايَتِ مَقْدونِيه قد پگ برارو امي رَقَم رفتار مُونِيد. وِلِي باز ام، اَى برارو، از شُمُو خَاهش مُونَم که مُحَبَّت شُمُو ازي کده ام کَلوَتَر شَنه ۱۱ و هَدَف شُمُو اِنْمِي بَشه که يگ زِندگي آرام دَشْتَه بَشِيد. دَ کاراي خودون خُو مَشْغُول بَشِيد و قد

دستای خو زحمت کشیده خرچ های زندگی خو ره پیدا
کُنید، اُمورقم که ازی پیش دز شمو امر کدُدی، ^{۱۲} تاکه شمو
د نظر غیر مسیحی ها اعتماد پیدا کُنید و د هیچ چیز محتاج
نَبشید.

ظهور مسیح

^{۱۳} برارو، ما میخائیم که شمو از وضعیت ایماندارای که فوت
کده، با خبر بشید تا شمو مثل کسای که اُمید زندگی ابدی
نדרه، غم و کوئیو نکنید. ^{۱۴} چون مو ایمان دری که عیسی مُرد
و بعد از مرگ دوباره زنده شد و ام یقین دری که د وخت
پس امدون ازو، خدا تمام ایماندارا ره که مُرده، قد مسیح
قتی پس میره. ^{۱۵} و اینمی توره ره مو از کلام مولا موگی:
یعنی مو که زنده آستی و تا روز ظهور مولا باقی مومنی از
مُرده ها کده پیشتر د حضور ازو نمیرسی. ^{۱۶} چون مولا خود
شی د آواز بلند و د صدای ملایکه اعظم و د صوت شیپور از
آسمو نازل موشه و اول کسای که د مسیح ایمان دشت و
فوت کدُ، اونا دوباره زنده موشه. ^{۱۷} بعد ازو، مو که تا هنوز
زنده آستی قد ازوا قتی سون اُورها و طرف عالم باله برده
موشی و قد مولا یگ جای شده تا ابد قد ازو مومنی. ^{۱۸} پس
قد امزی توره ها یگدیگه خو ره تشویق کُنید و دلداری بدید.

تباری بلده ظهور مسیح

۵ برارون عزیز، د باره وخت و زمان امزی واقعه ها لازم
نییه که یگو چیز بلده شمو نوشته کنم، ^۲ چون شمو خوب

میدینید که روزِ خُداوند رقمِ دُزی آسته که دَ غیتِ شاو مییه.

^۳ دَ امزُو وخت که مردمِ مَوگه: ”صُلح و اَمْنِیتِ آسته،“

بے بلغه مُصِیبت، خرابی و ویرانی دامونگیرِ مردمِ موشه مثلِ

که دردِ زیدو دَ سُرَاغِ خاتونِ شِکامتو مییه و هیچ راهِ بلده دوتا

کدو نییه. ^۴ لیکن شُمُو، آی برارو، دَ تریکی نیستید که او روز

شُمُو ره رقمِ یگ دُزِ غافلگیرِ کُنه، ^۵ چُون شُمُو بچکیچای نُور

و روزِ آستید. مو نه دَ تریکی کارِ دَری و نه دَ شاو. ^۶ پس، بیید

که رقمِ دیگر وری خاوبُرده نَبشی، بلکه بیدار و آدرِ بَشی.

^۷ چُون کسای که خاو مونه، اونا شاو دَ خاو موره و کسای

که خود ره نشه مونه اونا ام از طرفِ شاو نشه مَوکُنه. ^۸ ولے

مو که دَ روشنی روزِ تعلقِ دَری، باید آدرِ بَشی و ایمان و

مُحَبَّتِ خُو ره مثلِ زره وری دَ جان خُو کنی و اُمیدِ نجات ره

رقمِ کوله آینی وری دَ سر خُو کنی. ^۹ چُون خُدا مو ره بلده

ازی اِنْتِخابِ نَکده تا دَ غَضَبِ ازو گِرِفْتارِ شنی، بلکه برای

ازی که دَ وسیله مَولای مو عیسی مسیحِ نجات پیدا کنی. ^{۱۰} او

جان خُو ره بلده ازمو فدا کد تا که مو دَ وختِ ظُهورِ شی قد

ازو قتی زندگی کنی، چی بیدار بَشی، چی خاو. ^{۱۱} پس دَزی

تَرْتِیبِ دَ تَشْوِیقِ و تَقْوِیهِ یگدیگه خُو اِدامه بَدید، امو رقم که

آلی ام مَوکُنید.

نصیحت های آخری

^{۱۲} آکو برارو، مو از شُمُو خاهش مونی تا امو کسای ره که دَ

بین شُمُو دَ نامِ مَولا عیسی زَحمتِ میکشه و شُمُو ره دَ راهِ

مَولا نصیحت و راهنمایی مونه، دَ عنوانِ پیشوایون خُو

شَنخته دَزوا اِحْتِرامِ کنید ^{۱۳} و اونا ره از خاطرِ امزُو زَحمت

ها قد جان و دل خو مُحَبَّت و عِزَّت كَنِيد و قد يگديگه خو د
 صلح-و- صفا زندگي كُنيد. ^{۱۴} برارو، مو از شمو خواهش
 موني كه آدمای ثمبل و جُورِغَل ره سرزنش كَنِيد، افراد
 كم دل و ترسندك ره دلداري بديد، از نفرای ضعیف و كم وس
 پُشتيواني كَنِيد و قد پگِ مردُم صبر-و- حوصله كَنِيد.
^{۱۵} هوش كَنِيد كه دَ عَوْضِ بَدِي، بَدِي نَكَنِيد، بلكه همیشه
 كوشش كَنِيد كه قد يگديگه خو و ام قد تمامِ مردُم ديگه
 خوبي كَنِيد. ^{۱۶} هر غيت خوش بشيد. ^{۱۷} همیشه دُعا كَنِيد. ^{۱۸} د
 هر حالت كه اَسْتِيد، از خُدا شُكرگُزاري كَنِيد، چراكه اينمي
 خاست-و- اِرادِه خُدا بَلَدِه شُمو دَ راهِ عيسی مسيح اَسْتِه. ^{۱۹}
 آتَشِ رُوحِ اَلْقُدْسِ ره گُل نَكَنِيد. ^{۲۰} پيشگويی ها ره سُبُك-و-
 اَندَك فِكر نَكَنِيد، ^{۲۱} مگم دَ باره تمام چيزا تحقِيق كَنِيد و هر
 چيزِ خُوب ره محكم بگيريد. ^{۲۲} خودون خو ره از هر رقم بَدِي
 دُور نِگاه كَنِيد.

^{۲۳} خُداي كه سرچشمه صلح-و- سلامتی اَسْتِه، خود شی
 شُمو ره كاملاً پاک-و- مُقَدَّس كنه تاكه روح و جان و جِسْم
 شُمو تا روزِ ظُهُورِ مَولایِ مو عيسی مسيح، بے عيب و سَالِم
 بُمَنه. ^{۲۴} اُمُو كه شُمو ره دَعَوَتِ دَدِه قَابِلِ اِعْتِمَادِ و باوفا اَسْتِه
 و حتماً امی كارا ره پوره مونه.

^{۲۵} برارو، دَ حق ازمو دُعا كَنِيد. ^{۲۶} پگ برارو ره از دلِ پاک قد
 رُوی ماخی سلام بگيد. ^{۲۷} ما دَ نامِ مَولا شُمو ره قَسَمِ مِيدُم كه
 امی خط ره دَ تمام برارو بخانيد.

^{۲۸} فَيِضِ مَولایِ مو عيسی مسيح نصيبِ پگ شُمو شنه. آمين.

سوال داريد؟ +1 807.700.6090 

آزرگي © afghanbibles.org

Copyrighted material not for reprint/publishing purposes.